

Broj: 02-05-16920-1/13
Sarajevo, 07.06.2013. godine

Na osnovu čl. 22. i 24. stav 4. Zakona o Vladi Kantona Sarajevo ("Službene novine Kantona Sarajevo", broj: 24/03 - Prečišćeni tekst), Vlada Kantona Sarajevo, na **24.** sjednici održanoj **07.06.2013.** godine, donijela je sljedeći

ZAKLJUČAK

1. Utvrđuje se Prijedlog zakona o izmjenama Zakona o sudskim taksama.
2. Predlaže se Skupštini Kantona Sarajevo da pretrese i donese zakon iz tačke 1. ovog Zaključka po hitnom postupku, u skladu sa članom 159. Poslovnika Skupštine Kantona Sarajevo ("Službene novine Kantona Sarajevo", broj 41/12 - Drugi Novi prečišćeni tekst i broj 15/13).

P R E M I J E R

Suad Zeljković

Dostaviti:

1. Predsjedavajuća Skupštine Kantona Sarajevo
2. Skupština Kantona Sarajevo
3. Premijer Kantona Sarajevo
4. Ministarstvo pravde i uprave
5. Ministarstvo finansija
6. Evidencija
7. A r h i v a



web: <http://vlada.ks.gov.ba>
e-mail: vlada@vlada.ks.gov.ba
Tel: + 387 (0) 33 562-068, 562-070
Fax: + 387 (0) 33 562-211
Sarajevo, Reisa Džemaludina Čauševića 1



Bosna i Hercegovina
Federacija Bosne i Hercegovine
Kanton Sarajevo
VLADA

ZAKON
O IZMJENAMA ZAKONA O SUDSKIM TAKSAMA
(PRIJEDLOG)

Nosioci izrade
Ministarstvo pravde i uprave
Ministarstvo finansija

Sarajevo, juni 2013. godine

Na osnovu člana 18. tačka b) u vezi sa članom 38. stav 1. Ustava Kantona Sarajevo ("Službene novine Kantona Sarajevo", broj 1/96, 2/96, 3/96, 16/97, 14/00, 4/01, 28/04 i 6/13), Skupština Kantona Sarajevo, na sjednici održanoj _____ 2013. godine, donijela je

(PRIJEDLOG)

ZAKON O IZMJENAMA ZAKONA O SUDSKIM TAKSAMAMA

Član 1.

(Izmjena člana 4. Zakona)

U Zakonu o sudskim taksama ("Službene novine Kantona Sarajevo", br. 21/09, 29/09 i 14/11) član 4. mijenja se i glasi :

“Član 4.

(Plaćanje takse i preduzimanje radnji u postupku)

- (1) U slučaju da stranka sudu dostavi podnesak bez dokaza o plaćenju taksi, sud donosi rješenje iz člana 19. ovog zakona.
- (2) Sud će postupiti na način utvrđen u stavu (1) ovog člana i u slučaju kada odbije zahtjev za oslobađanje od plaćanja takse.
- (3) Neplaćena sudska taksa ne zadržava tok sudskog postupka.”

Član 2.

(Brisanje stava (4) člana 9. Zakona)

- (1) U članu 9. stav (4) briše se.

Član 3.

(Izmjena st. (1) i (2) člana 19. Zakona)

U članu 19. st. (1) i (2) mijenjaju se i glase:

“(1) Iznos takse koju je takseni obveznik dužan da plati obračunava službeno lice koje preduzima radnju u postupku, rješenjem kojim se stranka obavezuje da taksu plati u roku od osam dana od dana prijema rješenja.

(2) Protiv rješenja iz stava (1) ovog člana je dozvoljena žalba u roku od osam dana od dana prijema rješenja. “

Član 4.

(Stupanje sa snagom)

Ovaj zakon stupa na snagu osmog dana od dana objavljivanja u “Službenim novinama Kantona Sarajevo”.

Broj, _____
Sarajevo, _____ 2013. godine

PREDSJEDAVAJUĆA
SKUPŠTINE KANTONA SARAJEVO

Prof.dr.Mirjana Malić

OBRASLOŽENJE

Pravni osnov

Pravni osnov za donošenje ovog zakona sadržan je u odredbama člana 18. tačka b) u vezi sa članom 38. stav 1. Ustava Kantona Sarajevo, kojim je utvrđena zakonodavna nadležnost Skupštine Kantona Sarajevo, među kojima je i uvođenje taksi.

RAZLOZI DONOŠENJA

Izmjene Zakona o sudskim taksama predlažu se radi provođenja Odluke o dopustivosti i meritumu Ustavnog suda Bosne i Hercegovine, broj U 8/12 („Službeni glasnik BiH“, broj 10/13), kojom je utvrđeno da odredba člana 4. Zakona o sudskim taksama nije u skladu sa članom II/3.e) Ustava Bosne i Hercegovine i članom 6. stav 1. Evropske konvencije za zaštitu ljudskih prava i osnovnih sloboda (pravo na pravično suđenje), zato što onemogućavanje vođenja postupka ako na podnesak, uključujući i tužbu, nije unaprijed plaćena sudska taksa, ne predstavlja sredstvo koje je razumno proporcionalno ostvarenju legitimnog cilja, jer se na taj način potpuno ograničava pravo na pristup sudu, odnosno mogućnost vođenja sudskog postupka. Rok za usaglašavanje je šest mjeseci od objavljivanja ove odluke.

Ministarstvu finansija i Ministarstvu pravde i uprave dostavljene su i inicijative i preporuke Visokog sudskog i tužilačkog vijeća, Udruženja roditelja ubijene djece opkoljenog Sarajeva 1992-1995, Saveza logoraša u Bosni i Hercegovini i Vijeća nacionalnih manjina Kantona Sarajevo, u kojima se traže određene izmjene i dopune Zakona o sudskim taksama. Također, još uvijek nije razriješeno pitanje organa koji bi vršio prinudnu naplatu sudske takse, koje se mora razriješiti u dogovoru sa federalnim organima i Visokim sudskim i tužilačkim vijećem. Sve navedene inicijative i preporuke zahtijevaju širu raspravu, pa Radna grupa koju je obrazovala ministrica pravde i uprave smatra da se u ovom momentu trebaju predložiti izmjene i dopune Zakona o sudskim taksama koje se odnose isključivo na usklađivanje Zakona sa Odlukom Ustavnog suda Bosne i Hercegovine, da bi se zadovoljio rok koji ističe 11.8.2013. godine, a da se ostale izmjene i dopune Zakona pripreme u formi nacрта koji bi bio upućen u redovnu proceduru, nakon svih provedenih konsultacija neophodnih za predlaganje zakonskih rješenja.

PRAVNA RJEŠENJA

Član 1.-Odredbe člana 4. Zakona usklađuju se sa Odlukom Ustavnog suda BiH, odnosno zadržava se opšta odredba o plaćanju takse unaprijed, ali se sud obavezuje da, u slučaju da stranka sudu dostavi podnesak bez dokaza o plaćenju taksi, sud donosi rješenje iz člana 19. ovog zakona. Sud će postupiti na isti način i u slučaju kada odbije zahtjev za oslobađanje od plaćanja takse. Neplaćena sudska taksa ne zadržava tok sudskog postupka, te se tako omogućava svakom licu pristup sudu i vođenje postupka, kao jednom od osnovnih ljudskih prava utvrđenih u članu II/3.e) Ustava Federacije Bosne i Hercegovine i članu 6. stav 1. Evropske povelje o lokalnoj samoupravi.

Član 2. -Brisanjem stava (4) u članu 9. Zakona otklanja se diskriminacija koja je izvršena oslobađanjem od obaveze dostavljanja dokaza o plaćenju sudskoj taksi određenih pravnih subjekata i vrši usaglašavanje sa Odlukom Ustavnog suda Bosne i Hercegovine.

Član 3.- Izmjenom člana 19.st. (1) i (2) obavezuje se službeno lice koje preduzima radnje u postupku da donese rješenje, kojim obavezuje stranku da u roku od osam dana plati taksu, pravo na žalbu, koja ne odlaže izvršenje rješenja, te kontrolu naplate takse.

Član 4.- Propisuje se uobičajeni rok za stupanje na snagu ovog zakona.

HITAN POSTUPAK

Predlaže se donošenje ovog zakona po hitnom postupku, u skladu sa članom 159. Poslovnika Skupštine Kantona Sarajevo, jer se radi o uređivanju odnosa i pitanja za čije uređivanje postoji neodložna potreba, s obzirom na rok koji je utvrđen presudom Ustavnog suda Bosne i Hercegovine, a donošenje zakona o redovnom postupku moglo bi izazvati štetne posljedice za društvene interese u Kantonu.

FINANSIJSKA SREDSTVA

Za provođenje ovog zakona nije potrebno obezbijediti finansijska sredstva u Budžetu Kantona Sarajevo.

P R I L O Z I

ODREDBE ZAKONA O SUDSKIM TAKSAMA KOJE SE MIJENJAJU ILI POMINJU

Član 4.

(Uzajamnost plaćanja takse i preduzimanja radnji u postupku)

- (1) Sud neće preduzimati nikakve radnje ako takseni obveznik nije platio taksu propisanu ovim zakonom. U slučaju podnošenja podneska bez dokaza o plaćenju taksi, sud će pozvati stranku, odnosno njenog punomoćnika, da uplati taksu u roku od 8 dana, uz upozorenje da će joj podnesak biti vraćen. Ako stranka ne ispoštuje određeni rok, sud će podnesak vratiti uz obavijest da je vraćen zbog neplaćanja sudske takse i smatrat će se kao da nije bio podnesen.
- (2) Sud će postupati na način utvrđen u stavu 1. ovog člana i u slučaju kada odbije zahtjev za oslobađanje plaćanja takse.
- (3) Rokovi po Zakonu o parničnom postupku ne počinju teći dok taksa nije plaćena ili dok sud nije riješio zahtjev za oslobađanje od plaćanja takse.
- (4) Izuzetno od stava (1) ovog člana, ukoliko takseni obveznik ne postupi po pozivu suda i u ostavljenom roku ne uplati taksu na uloženi redovni ili vanredni pravni lijek, podnesak neće biti vraćen, već će se nastaviti postupak po uloženom pravnom lijeku, a prinudnoj naplati sudske takse pristupiće se u skladu sa odredbama ovog zakona.

Član 9.stav (4)

(4) Obaveze dostavljanja dokaza o plaćenju sudskoj taksi prilikom podnošenja podneska u sporovima male vrijednosti oslobođeni su javna preduzeća, ustanove i službe čiji osnivači su organi iz stava 1. tačka a), b), c), d) i e) ovog člana. Plaćanje sudske takse pada na teret one strane koja nije uspjela u sporu. Sudska taksa u ovim sporovima se plaća u roku od 8 dana od dana pravosnažnosti sudske odluke, a ukoliko se ne plati u tom roku prinudnoj naplati sudske takse pristupiće se u skladu sa odredbama ovog Zakona.

Član 19.

(Obračun i kontrola plaćanja takse)

- (1) Iznos takse, koju je takseni obveznik dužan da plati, obračunava službeno lice koje preduzima radnju u postupku, rješenjem protiv koga je dozvoljena žalba u roku od 8 dana po prijemu rješenja.
- (2) Izjavljena žalba ne odlaže izvršenje rješenja.
- (3) Kontrolu naplate takse vrši službeno lice koje preduzima radnju u postupku.

USTAV BOSNE I HERCEGOVINE

Član II/2

Prava i slobode predviđeni u Evropskoj konvenciji za zaštitu ljudskih prava i osnovnih sloboda i u njenim protokolima se direktno primjenjuju u Bosni i Hercegovini. Ovi akti imaju prioritet nad svim ostalim zakonima.

EVROPSKA POVELJA O LOKALNOJ SAMOUPRAVI

Član 6.

Pravo na pravično suđenje

1 Prilikom utvrđivanja građanskih prava i obaveza ili osnovanosti bilo kakve krivične optužbe protiv njega, svako ima pravo na pravično suđenje i javnu raspravu u razumnom roku pred nezavisnim i nepristrasnim, zakonom ustanovljenim sudom. Presuda se izriče javno, ali se novinari i javnost mogu isključiti s čitavog ili jednog dijela suđenja u interesu morala, javnog reda ili nacionalne sigurnosti u demokratskom društvu, kada to nalažu interesi maloljetnika ili zaštite privatnog života strana u sporu, ili kada to sud smatra izričito neophodnim zato što bi u posebnim okolnostima publicitet mogao nanijeti štetu interesima pravde.

USTAV KANTONA SARAJEVO

Član 18.

Nadležnosti Skupštine

Skupština Kantona:

b) donosi zakone i druge propise u okviru izvršavanja nadležnosti Kantona, izuzev propisa koji su ovim Ustavom ili zakonom dati u nadležnost Vlade Kantona;

VI- FINANSIRANJE I IMOVINA KANTONA

Član 38.

Finansiranje funkcija Kantona vrši se iz poreza, taksi i doprinosa koje uvodi Skupština. Finansiranje se može vršiti i iz drugih izvora, kao što su dotacije Bosne i Hercegovine i Federacije, zaduživanje kod banaka i drugih finansijskih organizacija, donacija i slično, o čemu odlučuje Skupština posebnim propisima.

POSLOVNIK SKUPŠTINE KANTONA SARAJEVO

(“Službene novine Kantona Sarajevo”,
broj 41/12- Drugi novi prečišćeni tekst i broj 16/13)

Član 159.

Zakoni se, po pravilu, ne donose po hitnom postupku.

Izuzetno, po hitnom postupku može da se donese samo zakon kojim se uređuju odnosi i pitanja za čije uređivanje postoji neodložna potreba i ako bi donošenje zakona u redovnom postupku moglo da izazove štetne posljedice za društvene interese u Kantonu.



Broj: 09-02-15835/13
Sarajevo, 28.05.2013. godine

29-05-2013

28-05-2013

KANTON SARAJEVO
MINISTARSTVO PRAVDE I UPRAVE

**PREDMET: Stručno mišljenje na prijedlog Zakona o izmjenama
Zakona o sudskim taksama.-**

Na osnovu člana 2. Uredbe o Uredu za zakonodavstvo Vlade Kantona Sarajevo ("Službene novine Kantona Sarajevo", broj: 7/06-Prečišćeni tekst) i čl. 4. Uredbe o postupku i načinu pripremanja, izrade i dostavljanja propisa ("Službene novine Kantona Sarajevo", br. 21/11-Novi prečišćeni tekst i 30/11-Ispravka), Ured za zakonodavstvo Vlade Kantona Sarajevo, daje slijedeće

MIŠLJENJE

1. Ured za zakonodavstvo Vlade Kantona Sarajevo nema primjedbi na dostavljeni materijal iz razloga što su predložene izmjene Zakona o sudskim taksama posljedica postupanja po Odluci o dopustivosti i meritumu Ustavnog suda Bosne i Hercegovine, broj: U 8/12 ("Službeni glasnik Bosne i Hercegovine", broj: 10/13).

2. Dostavljeni materijal je pripremljen u skladu sa Uredbom o postupku i načinu pripremanja, izrade i dostavljanja propisa ("Službene novine Kantona Sarajevo", br. 21/11-Novi prečišćeni tekst i 30/11-Ispravka), te se isti može razmatrati na jednoj od narednih sjednica Vlade Kantona Sarajevo, uz preporuku da se predmetni materijal dopuni sa mišljenjem Ministarstva finansija Kantona Sarajevo kao supredlagača prijedloga Zakona o izmjenama Zakona o sudskim taksama.

- Dostaviti:
1. Naslovu
 2. Evidencija
 3. Arhiva



SEKRETAR

Ahmed Ljubović, dipl.pravnik



web: <http://uz.ks.gov.ba>
e-mail: ured@ks.gov.ba
Tel/fax: + 387 (0) 33 560-448
Sarajevo, Hamida Dizdara 1





Broj:08-03-02-15836
Sarajevo,28.05.2013.godine

30-05-2013

MINISTARSTVO PRAVDE I UPRAVE
O V D J E

PREDMET:Mišljenje
Veza:Vaš broj:03-07-02-7857/13 od 27.05.2013.godine

Zakon o izmjenama i dopunama Zakona o sudskim taksama nije u suprotnosti s finansijskim propisima, a kako za primjenu istog nisu potrebna dodatna sredstva, to Ministarstvo finansija nema primjedbi na ovaj Prijedlog Zakona.

S poštovanjem,



MINISTAR
Muhamed Kozadra,dipl.ecc.



web: <http://mf.ks.gov.ba>
e-mail: mf@mf.ks.gov.ba
Tel: + 387 (0) 33 565-005, Cent.+ 387 (0) 33 565-000
Fax: + 387 (0) 33 565-052 i 565-048
Sarajevo, Maršala Tita 62

